

Wednesday, January 28, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



LOK SABHA MP

Nimin khan sawrkar laipuia Defence Minister Rajnath Singh hovin Lok Sabha leh Rajya Sabha Political Parties Floor Leaders ten Parliament Budget Session inpuahchahna atan an thukhawm a, Thutkhawmah hian sawm a nih angin Lok Sabha MP Pu Richard Vanlalmangaiha chu a tel a, Mizoram MP hian kumin fur ruahtui a tlak tak tak hmaa Sairang leh Khamrang kawng te tha taka siam vat vat a nih theih nan sorkar laipui chu chak lehzuala hma la turin a ngiat thu a sawi.

Main Committee Room, Parliament House Annexe, New Delhi-a 'meeting' an neihah hian Pu Richard Vanlalmangaiha hian nikum fur lâiin Mizoram châk lakna kawng pawimawh ber a chhiat avangin harsatna nasa tak a thlen thu a sawi a. Kuminah hian nikum lama Mizoramin harsatna nasa tak a lo tawh ang a thlen tawh lohna turin, sorkar laipui chu rang taka hma la turin a ngên a ni.



AMC

Mizoram sorkar leh Aizawl Municipal Corporation (AMC) -in MLA Hostel thlang kawngpui sira thei zuar mi 11 te chu AMC Multi-Complex Tuikual South building chhungah in sawn turin a hriattir.

Vawiina AMC thuchhuah in a tarlan danin, Khatla-a MLA Hostel building chu sak that a tul avang leh building hlui thiah a nih tak avanga a sakna hmun tur lei laih a ngaih avangin a thlang kawngpuia thut chu mihring tan a him loh avangin Mizoram Sorkar leh Aizawl Municipal Corporation (AMC) chuan MLA Hostel thlang kawngpui sira thei zuar mi 11 te chu loh theih lohin AMC Multi-Complex Tuikual South building chhungah a sawn chhuah a tul tih an sawi a, AMC chuan helai hmun hi parking area a ni thin a, hetihlai hian thei zuar te hma ngaiin thei zawrhna hmun atan hman turin December ni 3, 2019-ah AMC leh Thei zuar Association ten agreement ziah a ni a, tun thleng hian la kalpui zelin vendor 11 an thu mek tih sawiin, tun thla January ni 6 khan AMC chuan Thei Zuar Association President hnenab January ni 16 ral hma ngeia AMC Multicomplex Tuikual South, 3rd Floor (Seat No 17 to 16 & 41) ah in sawn tura hriattirna a pe a, Thei Zuar tute an la in sawn loh avangin January ni 23 khan show cause notice pek leh an ni a. Revenue Office bula thut an dil na chu AMC chuan phalsak an nih loh thu leh AMC Multicomplex Tuikual South-a insawn chhuak tura hriattirna lehkha chu January ni 23 khan, Theizuar Association President Khatla hnenah pek nawn leh a nih thu an tarlang a ni.



JAL JEEVAN MISSION

Ministry of Jal Shakti buatsaihin, Jal Jeevan Mission (JJM) hnuaia thingtlang khuaa tui lakte enkawlzui dan tur chungchanga, ruahmanna siam dan tur sawi hona hun, ‘Minister-Level Policy Dialogue on Sustainable Operation & Maintenance of Rural Drinking Water Services’ chu nimin khan Delhi-ah neih a ni a, Union Minister of Jal Shakti Pu C.R Patil hova State tina PHED leh RD/LAD Minister-te nen sawi hona hun hi hman niin, Mizoram PHED Minister Prof. Lalnilawma pawh he hunah hian a tel a ni.

Prof. Lalnilawma chuan Mizoram dinhmun tlangpui sawiin, Mizoram chu tui lakna hnarte pawh khua atanga hla tak taka awm an nih thu sawiin hnathawh leh enkawlzui pawh khawtlangin an enkawl tur atan chuan a hautak bik thute sawiin tlangram tan chuan chona lian tak a ni a ti a. JJM sum, Ministry, central sawrkar-a tang rei lutukte pawh release sak thuai turin a ngen ghal bawh a ni.

Jal Jeevan Mission (JJM) hi central sawrkar programme niin kum 2019 atang khan Mizorama thingtlang khaw tinte tan, tui connection a thlawna pekna tur scheme a ni a, tun dinhmunah hna hi zawh thawkhat tawh a ni. Kum 2019 atanga Kum 2025 chhungin Solar Pumping Scheme – 188, Gravity Scheme (Khawl tellova tui lak) – 657 leh Electric Pump hmanga Tui Pump – 7, avaiin 852 thawh zawh tawh a ni a, Mizoram thingtlang khua zawng zawngah hmalak a ni.



PM VISHWAKARMA SCHEME

Lawngtlai District ah vawiin khan kutthemthiamte chawikanna tura sawrkar laipui hmalakna 'PM Vishwakarma Scheme' chungchang inhrilhriatna DC Conference Hall- ah neih a ni.

Vawiina hun hmanah hian DC Pu Donny Lalruatsanga chuan thil siam chhuahte chu belhchian dawl, rintlak leh a tlo dan a zirin scheme hmangin eizawnna ngel nghet leh tlo neih theih a nih thu a tarlang a, scheme chhawr tangkai a nih theih nan mipui in an hriat zau zel a pawimawh thu sawiin mipuite hrilhriat tam a ngaih thu a sawi.



LUSHAI HEALTHY LUNGLEI

Lunglei District Bawrhsap kaihhruaina hnuaia "Healthy Lunglei District Campaign" kal tlanga Lunglei District-in hriselna kawnga hma a sawn theihna tur leh hriselna kaihhnawiha mipui mamawhte awlsam zawka inpek theihna atana mobile application duan thar, "LushAI Healthy Lunglei" App chu naktuk ningani hian tlangzarh a ni dawn.

Healthy Lunglei App hi Lunglei District mipuite tana siam niin, mipuite'n awlsam zawka sawrkar damdawi in leh damdawi zawrhate an dawr leh an biak pawh theih nana ruahman a ni a. He app hmang hian district chhunga sawrkar damdawi in leh health centre-a doctor-te thut hun tur a en theih dawn bakah, OPD-a inentir turin appointment a lak lawk theih dawn a. ABHA-a inziah luhna te, he app-a inziak lut damdawi dawr te atanga damdawi chah theihna te awmin, hriselna lama hriat tur pawimawh hrang hrangte pawh awlsam takin a hmuh theih dawn a ni.

He application hi tunlai thiamna thar ber Artificial Intelligence (AI) leh AI Agents hmanga thuam niin, OPD appointment laknaa pui thei tur leh zawhna hrang hrang Mizo tawnga chhang thei tur AI chatbot dah tel a ni a. He app-ah hian LushAITech-in AI model thar ber an siam chu hman niin, India hmarchhak state-ah chuan hriselna lama AI hman hmasakna zinga mi a ni.

